

## 2 THECAALOANIKA

### Riown Wargahng Agweed Poale

### Yihr Yaa Thecaaloanika

### Rob Ke Nying Warga

Alyaahb gihn ayug ree ke nying duuo gihr Jeacuu abar maalo ke duub nyepinye kiin akuud yaa yiho Thecaaloanika. Riown wargahng agweed Poale yihr yaa yiho Thecaaloanika rubo kaa nying gihn anaa angaahd nyoge naa kar duuo gihr Jeacuu keehdo ngo abeehno. Acohge piny wudh nyoge kejea duuo gihr Jeacuu be yug ree uwahdhe ka ubeehn raahyo ukeehde guge thar ruohdh gihr gihn me padh me cuohn ne 'Ngad Anyoohne' ge udihng mahn keehd Jeacuu ni.

Maa anyoadh Poale ngo yihr yaa ukwaan wargahng ni kejea mag gene yi yiho gihr gen beer mee keehd me nud giuh me reje wale raahme. Ubeehn kwaad dhaane utiihye ke cam ne boadh ree wa maa anaa ayug Poale maa jo tiihyo keehde, umahg gene yi tiihj gihn me beer.

#### **Kaa Acaan Luube**

Lum umodho 1:1-2

Muohj Kahw kede a leej 1:3-12

Puohny ke nying duu Jeacuu 2:1-17

Rob ke nying dhe yoohn beehdo me nyaahn  
3:1-15

Gug luube 3:16-18

<sup>1</sup> Beehda an, a Poal wa ke Cihla kede a

Timodhy, wa ne gweehdo yihru, wu yaa yiiho giih ne geen Thecaaloanika, wu ge ayiih lum Juog Wuro kedea Jeacuu Kriihjto Ruohdho ge aohr Juoge.

<sup>2</sup> Beehn Juog Wuur kedea Jeacuu Kriihjto Ruohdh cub gene muuny kedea doohr yihru.

*Muohj Kahw Kedea Giih Ciihm Cwihny*

<sup>3</sup> Jo wan, koohr Juog dhiil wane kaa muohjo ke cahng cahngo ke nyingu. Dhiil wane kaa muohjo bang gihn yiiho gihru adoohng e ngo bar wong maalo keraahyo, maa nhyaahro gihn ne keewu ngo adoohng duohng.

<sup>4</sup> Ke nying gihn nu e naa gihn beel wane beel ke nyingu keew yaa ayiiho. Wa beel kaa nying gihn abaru maalo ke yiiho gihru kedea ke nying gihn aromu guum giih raahm maa giih ajohr naa ayug yaa akwaahdh wune rogu.

<sup>5</sup> Gihn ayoadu giih raahm maa giih ajohr nyoadh ngo kejea Juog lug angahye ke luuo. Kedea awaahn kan, ke nying giih yihdh ge akaahnu wu adoohng ne nyoge me rom beehdo yi Dhaahr Juog. Beehda ke nying gihn nahgu yaa Dhaahr Juog kedea ke nying giih ayiihu e naa gihn yoadu giih raahm maa giih ajohr awaahn ni.

<sup>6</sup> Juog ngahy lug. Ngo ubeehn ne kihm yaa ni anaa atiihy giih ajohr rogu kedea uyoad gene giih raahm rog.

<sup>7</sup> Kedea Juog ubeehn ne cub yoohm rog yihru wu yaa abuohj ke guum, maa yihr wan

---

**1:3 1:3** 2:13; 1Th 1:2-3    **1:4 1:4** 1Th 2:19-20; 3:3, 7    **1:5 1:5**  
 Pihp 1:28    **1:6 1:6** Rom 12:19; Any 18:6    **1:7 1:7** Mat 25:31;  
 1Th 5:1-2

thiow. Gihn nu ubeehn Juoge ne tiihyo kii beehn Jeacuu Ruohdho ke yoohn maalo keehd amahr wuohdjuog giie.

<sup>8</sup> Ngo ubeehn kaa maaj muu unyaahm. Ngo ubeehn ne bang yaa akweer ke Juog kedea yaa akweer ke mag Ciig Beer. Ciig Beer ge rubo ke nying Jeacuu Kriihjto Ruohdh.

<sup>9</sup> Kwaad yaa nu ge buu uwii Juoge. Gihn me raaj uyug Juoge rog gen umaan gene gihn kuow gene ke nyinge. Nyoadh ngo kejea Juog ge ukoye yi raahyo me guge tooro beere Jeacuu, be niid gene kedea mihr Paar Juog be yoad gene.

<sup>10</sup> Cahng Duohng ubeehn: Cahng ubeehn Jeacue beere wiie moar yaa alihng lume moaro cang kedea upoong yaa ayiie ngo. Wu thiow wu unaa kiin gen bang gihn lum apuohny wane yihru ayiihu.

<sup>11</sup> Ke nying giie nu cang e naa gihn kway wane Juog ke nyingu. Juog akway wane, uyuge wun ne nyoge me beeye me rom beehdo keehde. Beehn Juog cube tee gihre yihru kedea konye wun uromu gihn beer ke yiho maa ukeehle yiho gihru guge.

<sup>12</sup> Neehn maano, e nying Jeacuu utihngu maalo kedea wun thiow nyingu utihnge maalo ke dhe yoohn muuny gihr Juog Wuro kedea Jeacuu Kriihjto Ruohdh.

## 2

<sup>1</sup> Awaahn ni, ke nying duu Jeacuu Kriihjto Ruohdho keehdo, kedea ke nying mad won

bange, nyingu akwaya jo wan kejea,

<sup>2</sup> wudhu keá meehgu lyaahb maa rogu keá meehgu dwaahngo kejea cahng duu Ngad Boadh nyoge abeehno. Arob kejea duu Jeacuu ngo loohng maa abeehn oogo kii dhog wan wale kejea wa agweehdo ke nyinge yihru.

<sup>3</sup> Rogu keá meehgu dwaahngo keehd me rob gihn ke nying duu Jeacuu. Jeacuu buu uguo beehno e ngaa apaahr oogo ne yug liny ke Juog poohd kuu atuohl. Ngaan cuohn ne Ngad Anyoohne, e ukoy Juoge oogo yi raahyo me guge tooro.

<sup>4</sup> Ngad Anyoohne upaahr oogo rih Juog kedeaa ree ucube piny kea e naa ngaa me wiihe ne maalo rog giih lam dhog ke nying gen, keehd Juog ke ngude ge wuor, ngo ucidh thiow upiiehe yi Wod Juog gihr Jeruucalem ne nyoadh ngo kejea e naa Juog Aciehg.

<sup>5</sup> Ngahda ngo dhiilu kaa ngahyo kejea giih ni a anaa arubo ke nying gen yihru ge anaa abeehda ke wun;

<sup>6</sup> kedeaa ngaa mahn Ngad Anyoohne ke tuohl awaahn ni, e cahng tuohle poohd kuu awahnho, ngo ngahyo thiow.

<sup>7</sup> Teeg Ngad Anyoohne ge tiihye ke piny e kwihj nyoge ngo nud keehd won awaahn ni, keehd maa amahne ke tuohl yi caang ni. Ngad Anyoohne utuohl nea ngaa amahn ngo ke tuohl cinge awiie rih ngo ne meehg ngo tuohl.

<sup>8</sup> Abea ge ubeehn Jeacuae, e Ngad Anyoohne uthow utoor gihr nyinge yi niid uniide teeg

abeehno ke Jeacuu.

<sup>9</sup> Ngad Anyoohne ubeehn kaa dhe yoohn giih atiihy atiihb ukeehge kede a ree unyoadhe kejea e atuohl kaa dhe yoohn giih toohd me gaahy nyoge ge utiihye.

<sup>10</sup> Ree unyoadhe thiw kaa dhog yiehdh kwaad anyoohne giih utiihye. Giih nu ge utiihye ne muum wudh yaa urwaahny ubahnge boadh wahy be yoad gene. Ge arwaahnyo bang gihn ge akweer ke yiih lubo maa adiehr beere wahy gen ke boadh.

<sup>11</sup> Noono e Juog gihn me teeg me raaj uohre bang yaa kuu ayiiho. Gihn muu umuum wudh gen uyiih gene giih toohd.

<sup>12</sup> Kaano e anyoohne giih yaa akweer ke yiih lubo maa adiehr kede a unahge giih anyoohne ge ne nhyaar gene, ge uteed Juoge oogo uling nyoge gen cang.

### *Ngahm Cwihny Dhaano Ubahnge Wiihe Be Waare*

<sup>13</sup> Abea wu jo wan! Juog koohe dhiil wane kaa muohjo ke nyingu. Wu anhyaar Juoge e naa gihn akwanye wun unahgu keew yaa umodho ne yoad bodho bang Wahy Juog. Wu akwany Juoge uboadhe wun naa ameehge Wahy Juog log wun ne yaae kede a naa atoor gihn maa adaag yi cwihnyu yi lum Juog naa ayiihu udoohngu ne yaa Juog.

14 Ke nying giih nu anhyaar Juoge wun e naa acuohn Juoge wun ge anaa apuohny wane Ciig Beer yihru beere muuny Juog yoadu yoado.

15 Noono jo wan, deedu cwihnyu kedea magu loohng apuohny wane yihru teeg mee, kwaad luub alihngu yi dhog wan kedea kwaad muu akwaanu yi warga.

16-17 Juog Wuro yi beeyo gihre, nhyaahro gihre anyoadhe yihro kedea ucube gaahno maa awuob yihro. Maa uciihme cwihnyo yihdh giih me poohd ne wong maalo. Juog kway wane kwayo maa Jeaclu Kriihjto Ruohdho beere teeg aduulo maa rob loohng maa adiehr cub gene cubo yihru yi kwaad gihn me beer e tiihyu.

### 3

1 Jo wan! Lum dhe caahn me roba yihru e man: Kwahyu ke nying wan beere loohng gih Juog unyaay ubare wong maalo kedea beere ngo ke yiiho wa kwaad kaa ayiihu ngo.

2 Kedea kwahyu ke nying wan thiow, beere Juog wa konye konyo yihdh giih me reje kedea yihr kwaad yaa reje, bang gihn padh nyoge cang ge ne yiih lum Juog.

3 Abea keehd maano e Juog wu buu uwiie oogo, wu ukonye yihdh giih me reje, bang gihn ngo ngaa me wiihe be waare.

4 Wudh wan ayab Juoge thiow unghy wane cwihnyu. Kedea ngahy wane kejea wu ubeehdo

kedea ubaru maalo ke beehdo ke dhe yoohn kaa ateed wane ngo yihru.

<sup>5</sup> Kwayo Juog unyoadhe dhe yoohn ngey nyaahro gihre kedeá dhe yoohn guum gihn anyoadh Ngad Boadh nyoge.

*Madu Yihdhu Kedeá Nahgu Yaa Tiihj*

<sup>6</sup> Jo wan! Amor acub wane yihru ke nying Jeacuu Kriihjto Ruohdho, kejea coohru rogu oogo buud yaa nyaahbo giih akweer ke lihng loohng gihn arob wane yihr gen ni.

<sup>7</sup> Wu ke ngudu ngahyu ngo kejea nea kare, e kwaad giih atiihy wane ge dhiilu kaa tiihyo. Wa kuu anaa nahg yaa nyaahbo ge anaa abeehd wane keehd wun.

<sup>8</sup> Wa anaa abeehdo e wa utiihyo ke nying nihn beere wa be doohng ne yaa acam dhaahr now. Bekihd gihn maa ayoad wane now e ngo kuu angweew wane.

<sup>9</sup> \* Beehda adiehj wan ubeehd wane e wa be tiihyo uyoad wane cam kar bahb wan. Abea wa atiihyo bang ne nyoadh ngo yihru beere wu utiihyo neehn mar wan.

<sup>10</sup> Ge apoohdo ke ka maa acielo ngo na rob wane robo yihru kob wane, “Ngaa kweer ke tiihy cam keá cub yihre.”

<sup>11</sup> Giih nu ateed wane yihru bang gihn alihng wane ngo kejea nud ke nyoge kiinu me beehda yaa nyaahbo kedeá tiihj be daahd gene. Koohm nyoge ayihny gene kedeá ge koag ke ne reem yi gihn me padh gihr gen.

---

**3:6 3:6** 3:12; 1Th 5:14    **3:8 3:8** 1Th 2:9    \* **3:9 3:9** Tiihy 18:3;  
 1Th 1:6Adiehj wan: 1Kor 9:4    **3:10 3:10** 1Th 4:11    **3:11 3:11**  
 1Tim 5:13

<sup>12</sup> Ngo rob wane robo yihr kwaad yaa nu, kedea ge toohn wane kaa nying Jeacuu Kriihjto Ruohdho kejea kwany gene yooh me beer utiihy gene beere cam gen yoad gene kaa kwahg.

<sup>13</sup> Abea jo wan, wu keá dhieg yi tiihy gihn me beer.

<sup>14</sup> Ka moogo e dhaano nud muu ukweer ke lihng rob gihn agweed wane kan kedea uohr wane ngo yihru. Yihr kwaad ngaan nu, boaru ngo beer mee. Wudhu keá cubu rog gihe na tiihye beere ngo uyaahr.

<sup>15</sup> Kwaad ngaa nu keá magu ke cwihnyu wa ngad mahn, abea toohnu ngo wa ngaa maa wad.

### *Kwaj Kedea Wiihwo*

<sup>16</sup> Kwayo Juog ge beer ge acub doohr yihru ke cahng cahngo kedea beehn Ruohdho maanye wun.

<sup>17</sup> Beehda a Poal e ne gooy wudh luub ni piny ke gweed cinga. Wu amaahdha. E naa ka gweeda nyinga kii ngo noono yihdh wargae giih ne nyoadh ngo kejea a naa agweehdo.

<sup>18</sup> Beehn muuny gih Jeacuu Kriihjto Ruohdho doohnge keehd wun cang.



## **Luwo**

### **Luwo: Anweehd Me Nyaahn New Testament**

copyright © 2003 Wycliffe Bible Translators, Inc.

Language: Luwo

Contributor: Wycliffe Bible Translators, Inc.

All rights reserved.

2025-05-10

---

PDF generated using Haiola and XeLaTeX on 10 May 2025 from source  
files dated 10 May 2025

ba8353b1-57d5-55f2-870a-7ae8e7acbe62